

LLETRES NUEVES

Discretu silenci

I

Aquella nueche de branu
sentíte tan cerca
qu'otra vuelta te llamé llumor.
Foi entós cuando te dixi
pallabres de discretu silenci,
d'encesu amor tapecíu
pol mieu
de ser impertinente
a tos güeyos.

II

To siempre pesllada puerta
entornesti daqué, nun sé si por feble
o por gratitú nublinsa.
Falare falando arrecho,
a gustu y claro,
y sentíte un baltu y un aliendu.
Quixite. Fonderamente quíxite como si los nuestos corazones
llatieren yá al empar, un tiempu y otru tiempu.

Llueu sedría mañana y afalaguéstime
xuntando, lloñe, to cuerpu a mio cuerpu, na nueche fría del alma d'agostu.

Mañana sedría namás l'alcordanza:
un xestu, una pallabra, el to rir, el falar,
el dicer, el bullir,
a pasinos, sele,
lladeando siempre l'esnidiosu cuerpu,
la mirada llimpia, l'atención atenta.
Nun sé si llumor chisgando de llueñe ente cuetos

XUAN P. REYÁN

Caparina de la seronda

Tienes na mirada esi dulzor conocíu
pintasti de colores la mio vida
una vida gris hasta qu'aportasti tu
vas dulces esmesando'l tiempu
deprendiendo a esnalar de la mio mano
unque tarreza la priesa que tien el tiempu
por pasar ceo, alloñándote del mio llau
sé que tendré que dexar qu'esnales sola
al alcuentru del to futuru dayures
esnala caparina de la seronda
yo quedaré nel nigu de la to infancia
pa cuando quieras volver abellugate

LUIS M. FERNÁNDEZ

Nacer, crecer,
sufrir, querer...
Ensin aliendu, ensin descansu.
Suañar, medrar,
dormir, amar...
Dioses d'un mundu emprestáu,
fumos d'eternidá
y, a la fin:
 pación de gusanos,
 semienta de flores.

ELVIRA LARUELO DE LA ROZ

Si siento la to mano na mía
seré quien a andar.
Abriré los güeyos,
zarraré'l pasáu,
y entamaré –otra vuelta– a crecer, a confiar.

Si tengo nos mios llabios los tos besos,
si me mires,
si m'abrases,
si me fales,
atroparé la fuercia pa lluchar.

ELVIRA LARUELO DE LA ROZ

**EL MIRUÉGANU
NAVIDAD DEL AÑO 2000**

Un rosariu de miruéganos
pa so nietín trai la güela,
enfilaos unu tras d'otru
nuna erba de piñera;
pañólos ente l'argaña
que con delu marchar dexa;
pos la compañía non solo
fai que'l tilín remaneza.

¡Como hai Dios, pa ente mi escurro!
que pudo mazcalos ella;
pos esi ricu manxar,
¿Qué será, lo que non tenta?
Eso sí, pero ¡ai amigu!
coses que Dios encimienta:
cuando los mazca'l nietín,
diz que los saborga ella...
.....

Nes monxines del Naranco
(cachín de Cielu na tierra),
peco sinón lo avocinglo
pa que la xente lo sepia,
afáyase la güelina
un xaspe de llimpia fecha.
Ta cucando pensatible...
–¿Por qué cuques pa La Cuesta?
– Cuco si habrá miruéganos,
pal mio nietu, por si allega:
Sinon, pal Neñu Xesús,
qu'Esi, né, xamás me dexa.

ANTONIO GONZÁLEZ BUSTO

(Felicitación navidiega que sigue al Cartafueyu nº 55 y a la publicada na revista *Lletres Asturianas*, de xineru del 2000, correspondiente al año 1999).